



Headlines

- भारत ते न्यूजीलैंड दे 5 समझौतें पर दस्तखत कीते ना। प्रधानमंत्री नरेन्द्र मोदी होरें आखेआ ऐ जे दौनें पक्खें, रक्षा ते सुरक्षा सरबन्धी सांझ-भ्याली गी तगडा ते संस्थागत बनाने दा फैसला कीता ऐ।
- जम्मू-कश्मीर विधानसभा नै सदन दे कम्मकाज मतल्लक बिज़नेस एडवाईज़री कमेटी दिएं सफारशें आहली रिपोर्ट गी सब्भनें दी सैह्यति कन्नै मंजूरी करी लैता ऐ।
- समाज कल्याण मंत्री सकीना इत्तू होरें जम्मू-कश्मीर च समाजी सुरक्षा आहली बक्ख-बक्ख योजनाएं तैहत पेंशन दी रकम बेल्ले सिर जारी कीते जाने दी जरूरतै पर जोर पाया ऐ।
- कुपवाडा च होए दे टाक्करे च सुरक्षाबलें इक आतंकवादी गी मारी-मुकाया ऐ। कुलगाम जिले दे कैमोह इलाके च सुरक्षाबलें इक आईईडी दा पता लाइयै उसी तबाहू करी दिता ऐ।
- श्री माता वैष्णो देवी जी दे आधार शिविर कटरा दे इक होटलै च कथित तौर उप्पर शराब पीने दे मामले च पुलसै इक सोशल मीडिया इन्फ्लूएंसर सने कुल 8एं जनें खलाफ मामला दर्ज कीता ऐ।



PM-NZL Talks

भारत ते न्यूजीलैंड नै रक्षा, शिक्षा, खेडू, बगवानी ते जंगलात खेत्तरे च 5 समझौतें पर दस्तखत कीते ना। नमीं दिल्ली च अज्ज दौनें देसें मुक्त बपार समझौते पर गल्लबात शुरू करने ते पेशेवरें ते हुनर कौशल मजदूरें दी आओजाई सुविधाजनक बनाने दी बवस्था पर गल्लबात कीती। प्रधानमंत्री नरेन्द्र मोदी ते न्यूजीलैंड दे प्रधानमंत्री क्रिस्टॉपर लक्सन हुंदे मझाटै चर्चा च भारत न्यूजीलैंड सरबन्धे दे बक्ख-बक्ख पैहलुएं पर गल्लबात होई प्रेस लेई जारी इक बयान च प्रधानमंत्री मोदी होरें आखेआ जे दौनें पक्खें रक्षा ते सुरक्षा सांझेदारी गी मजबूत करने दा फैसला कीता ऐ। उनें आखेआ जे सांझे अभ्यास, सिखलाई, इक-दुए दिएं बंदरगाहें दे दौरे दे कन्नोकन्नी रक्षा खेत्तर च सहयोग गी बढ़ावा देने लेई इक रोडमैप तैयार कीता जाग। इस मौके पर बोलदे होई प्रधानमंत्री होरें आखेआ।



BAC

जम्मू-कश्मीर विधानसभा नै सदन दे कम्मकाज मतल्लक, बिज़नेस एडवाईज़री कमेटी दिएं सफारशें गी अज्ज सब्भनें दी सैह्यति कन्नै पास करी दिता ऐ। जम्मू-कश्मीर विधानसभा दे स्पीकर एडवोकेट अब्दुल रहीम राथर होरें इस रिपोर्ट पर ध्वनि मत कन्नै वोटिंग कराई जेह्दे परैन्त सदन दे सदस्यें आम सैह्यति कन्नै इनें सफारशें गी पास करी दिता। इनें सफारशें मूजब, अज्ज 17 मार्च दे कन्नो-कन्नी 22 मार्च ते 24 मार्च गी बी सदन दा कम्मकाज बडुलै 10 बजे शुरु होए ते संझां 5 बजे संपन्न होई जाहगा। इस दरान दपैह्ही'लै डेढ बजे शा ढाई बजे

तगर इक घैंटे दा वकफा होगा। एह्दे अलावा सदन च 11 अप्रैल लेई प्रस्तावित कम्मकाज गी हून 25 मार्च गी तोड़ चाड़ेआ जाहगा। सदन दे कम्मकाज मतल्लक सलाहकार कमेटी दी रिपोर्ट दे मूजब, कम्मकाज आहले नमें कलैंडर गी बी सब्भनें दी सैह्यति कन्नै मंजूर करी लैता गेआ ऐ।

<><><><><><>

Pension

सेहत ते डाक्टरी शिक्षा मैह्कमे दिएं मंत्री सकीना इतू होरें जम्मू-कश्मीर च पेंशन सरबंधी बक्ख-बक्ख योजनाएं जि'आं संगठित समाजी सुरक्षा योजनाएं ते इंदिरा गांधी राश्ट्री बजुर्ग आवस्था पेंशन योजना दे तैहत लाभार्थिं गी पेंशन दी अदायगी बेल्ले सिर कीते जाने दी जरूरतै पर जोर पाया ऐ। मंत्री होर शमीम फिरदौस हुंदे आसेआ पुच्छे गेदे इक सोआलै दा परता देआ करदिआं हिआं। उ'नें दस्सेआ जे संगठित समाजी सुरक्षा योजनाएं दे तैहत पेंशन दी रकम जारी करने दी ब्यौरेवार प्रक्रिया बारै जानकारी, इस योजना दे नियमें च उपलब्ध करोआई गेदी ऐ। उ'नें इब्बी दस्सेआ जे इंदिरा गांधी नेशनल ओल्ड-ऐज पेंशन स्कीम तैहत पेंशन दी अदायगी एन.एस.ए.पी-पीपीएस पोर्टल दे राहें कीती जा'रदी ऐ। मंत्री होरें गलाया।

<><><><><><>

Terrorist-Killed

कश्मीर दे कुपवाड़ा जिले च सुरक्षाबलें ते आतंकवादियें बश्कार टाकरे च इक बेपंछानू आतंकवादी मारेआ गेआ ऐ। टाकरा अज्ज बडुलै शुरू होआ। इलाके च आतंकवादियें दे छप्पने दी पक्की सूह थहोने परैंत सुरक्षाबलें इलाके दी घेराबंदी करियै तपाशी अभियान रम्भेआ हा। सेना दे प्रवक्ता नै दस्सेआ जे छप्पे दे आतंकवादियें सुरक्षाबलें पर गोलीबारी शुरू कीती, जेदा सुरक्षाबलें आसेआ परता दित्ता गेआ। जवाबी कार्रवाई च इक आतंकवादी मारेआ गेआ। टाकरे आहली थाहरा इक ए.के-47 राइफल बरामद कीती गेई ऐ। उआं मरोए दे आतंकवादी दी पंछान ते एहू केह्डे आतंकी गुट कन्नै कम्म करा रदा हा, इस बारे जानकारी गी अजें बलगेआ जा'रदा ऐ। तोआई, सेना दे प्रवक्ता नै दस्सेआ जे अभियान अजें जारी ऐ।

<><><><><><>

IED-Recoverd

सुरक्षाबलें अज्ज कुलगाम जिले दे कैमोहू इलाके च इक संदिग्ध आईईडी दा पता लाया ते मगरा इक नियंत्रित धमाके दे राहें इस संदिग्ध आईईडी गी तबाहू बी करी दित्ता। पुलसै दस्सेआ जे ऐ जे उ'नें अनंतनाग-शोपियां सिडकै पर कुलगाम दे कैमोहू इलाके च इस आईईडी दा पता लाया हा। इस बारै पता लगदे गै सिडकै पर दौने बक्खी दा गड्डिं दी आओजाई रोकी दित्ती गेई ते बम्ब नकारा करने आहले दस्ते गी उत्थे सद्दी लैता गेआ। मगरा इक नियंत्रित धमाके दे राहें इस आईईडी गी तबाहू करी दित्ता गेआ ते इस दरान कोई नुकसान नेई होआ। आईईडी तबाहू करने दे बाद सिडकै पर गड्डिं दी आओजाई परतियै शुरू करोआई दित्ती गेई।

<><><><><><>

Katra-FIR

श्री माता वैश्वानो देवी दी जातरा दे आधार शिविर कटरा दे इक होटल च कथित तौर पर शराब पीने दे मामले च पुलसै 8एं जनें खलाफ मामला दर्ज कीता ऐ जिं'दे च सोशल मीडिया इन्फ्ल्यूएंसर ओरहान अवतरामनी बी शामिल ऐ, जिसी ओरी दे नांऽ कन्नै जानेआ जंदा ऐ। जम्मू-कश्मीर पुलसै इक बयान जारी करियै आखेआ ऐ जे कनून दी उल्लंघना करने दे आरोप च 8एं जनें खलाफ एफआईआर दर्ज कीती गई ऐ ते इंदी धर-फगड़ लेई इक टीम खडेरी गई ऐ। ध्यानजोग ऐ जे कटरा पुलस थाने गी एहू शकैत हासल होई ही जे जंदा 15 मार्च गी कटरा दे इक होटल च किश लोक शराब पीआ करदे हे जेह्दे परैन्त पुलसै 8एं जनें खलाफ मामला दर्ज कीता। इस सरबंथे च मीडिया कन्नै गल्लबात करदे होई रियासी दे एसएसपी परमवीर सिंह होरें गलाया ।

Oath-Judges

जम्मू-कश्मीर ते लद्दाख हाई कोर्ट दे मुख न्याधीश जस्टिस ताशी रबस्तान होरें अतिरिक्त जजे न्याधीश वसीम सदीक नागल, न्याधीश राजेश सेखरी ते न्याधीश मोहम्मद युसुफ वाणी होरें गी जम्मू-कश्मीर ते लद्दाख हाई कोर्ट दे जजे दे तौरा पर मुख न्याधीश हुंदे कोर्ट रूम च शपथ दिलाई। शपथ समारोह च हाई कोर्ट दे साबका जजे, मुख सचिव, जम्मू-कश्मीर हाई कोर्ट बार एसोसिएशन दे प्रधान, सिविल ते पुलस प्रशासन दे अधिकारियें सने रजिस्ट्री दे अधिकारियें ते अमले नै शिकरत कीती।

<><><><><><>

Cooks' Wages

स्कूली शिक्षा ते उच्च शिक्षा मैहकमे दिएं मंत्री सकीना इत्तू होरें अज्ज विधानसभा गी जानकारी दित्ती जे पीएम-पोषण अभियान दे तैहत कम्म करै करदे रसोइयें ते हेल्परें दी उजरत च बाद्दे आहले मामले गी पीएम-पोषण दे परियोजनाएं गी मंजूरियां देने सरबंथी बोर्ड दी बैठका दुरान पुट्टेआ जाहगा। मंत्री होरें मुज़फ्फर इक़बाल खान हुंदे आसेआ पुच्छे गेदे इक सोआलै दे परते च एहू जानकारी सांझी कीती। उ'नें सदन गी दस्सेआ जे भारत सरकार दे शिक्षा मंत्रालय दे नियमें ते दिशा-निर्देशें मूजब, रसोइयें ते हेल्परें गी मजूदा समें च इक्क बारी दी रूट्टी तैयार करने लेई हर म्हीने 1 ज्हार रपें दी रकम मानदेय दे तौर उप्पर दित्ती जा करदी ऐ। मंत्री होरें इब्बी दस्सेआ जे इ'ंदे मानदेय च बाद्दे दी मंग बोर्ड दी पिच्छली बैठक दुरान बी रक्खी गई ही पर इसी मंजूर नेहा कीता गेआ। उस बेल्ले एहू आखेआ गेआ हा जे इ'नें रसोइयें ते हेल्परें गी पूरे मुल्खै च इक-सार मानदेय दित्ता जंदा ऐ ते छडा कुसै इक राज्य जां केन्द्र शासित प्रदेश च इक्कले जां बक्खरे तौर उप्पर इ'ंदी उजरत च बाद्दा नेई कीता जाई सकदा।

<><><><><><>

Heritage-City

सरकारै अज्ज आखेआ ऐ जे पराने जम्मू शैहरै गी विरासती शैहर घोषित करने दा अजै कोई बी प्रस्ताव नेई ऐ। सेहत ते मेडिकल शिक्षा मंत्री सकीना इत्तू होरें अज्ज आखेआ जे इस्सलै च ऐसे कुसै बी प्रस्ताव पर विचार नेई कीता जारदा ऐ। मंत्री होर मुखमंत्री उमर अब्दुल्ला हुंदी थाहर पर एमएलए युद्धवीर सिंह हुंदे आसेआ पुच्छे गेदे सोआल दा परता देआ रदियां हियां।

<><><><><><>

Zero Hour

जम्मू-कश्मीर विधानसभा च अज्ज प्रश्नकाल दौरान विधायकें आसेआ जनता दे बक्ख-बक्ख मसलें ते मामलें गी पुट्टेआ गेआ। हरजतबल थमां विधायक सलमान सागर होरें सभा दी कार्रवाई सरंबधी गोपनियता भंग होने पर चैंता जाहिर कीती। विधायक शमीमा फिरदौस, एहसान परदेसी, मुश्ताक गुरू ते तनवीर सद्दीक होरें विधायक सलमान सागर हुंदे आसेआ इस मामले दी जांच दी मंग ते एहदे लेई जिम्मेदार खलाफ सख्त कार्रवाई करने दा समर्थन कीता। तोआई, बारामूला थमां विधायक जावेद बेग, बिजबिहाडा थमां विधायक डॉ. बशीर वीरी, रामगढ थमां विधायक डॉ. धर्मेन्द्र कुमार मन्याल, बाहू थमां विधायक विक्रम रंधावा, डोडा वेस्ट थमां शक्ति दत्त परिहार ते होरनें विधायकें बी अपने-अपने हल्के थमां लोकें दी मंगें ते उंदी दिक्कत-परेशानियें गी उजागर कीता।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एहू 120मीं किश्त होगा। कार्यक्रम च शामिल करने लेई लोक अपने बचार ते सुझाहू 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एहू कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नो एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>